

AKIDAH AHL AL-SUNNAH WA AL-JAMA'AH DALAM KONTEKS Fiqh AL-WATAN BAGI PEMBINAAN KELESTARIAN NEGARA

[THE AHL AL-SUNNAH WA AL-JAMĀ'AH CREED AND Fiqh AL-WAṬAN: A FRAMEWORK FOR NATIONAL SUSTAINABILITY]

NURUL HUSNA MOHD PIDRUS^{1*}, MOHD HASRUL SHUHARI¹, MUHAMMAD RASHIDI WAHAB¹,
 NOR FARIDAH MAT NONG¹ & MUHAMMAD HAFIZI ROZALI¹

^{1*} Fakulti Pengajian Kontemporari Islam, Universiti Sultan Zainal Abidin (UniSZA), Kampus Gong Badak, 21300 Kuala Nerus, Terengganu, Malaysia.

Correspondent Email: hasrulshuhari@unisza.edu.my

Received: 24 September 2025

Accepted: 26 November 2025

Published: 17 Disember 2025

Abstrak: Akidah *Ahl al-Sunnah wa al-Jama'ah* merupakan pegangan utama majoriti umat Islam berpaksikan manhaj para ulama salaf dan khalaf yang diwarisi secara turun temurun. Apabila dilihat dalam konteks *Fiqh al-Watan* yang merupakan tatacara kehidupan bertanah air, ia berpotensi menjadikan pentadbiran negara selari dengan tuntutan syiar Islam. Cabaran dan ancaman terhadap masyarakat Islam berada dalam keadaan yang membimbangkan akibat berlakunya pelbagai tentangan dan ideologi menyimpang. Situasi ini menjadikan pendekatan *Ahl al-Sunnah wa al-Jama'ah* berlandaskan *Fiqh al-Watan* sebagai keperluan untuk memelihara agama dan kestabilan sosial. Kajian ini menggunakan pendekatan kualitatif dan kaedah analisis kandungan induktif, deduktif dan komparatif bagi menghasilkan dapatan kajian. Dapatan kajian menunjukkan bahawa *Ahl al-Sunnah wa al-Jama'ah* menerusi *Fiqh al-Watan* menolak sebarang fahaman ekstrem dengan mengamalkan prinsip *wasatiyyah* yang membawa keseimbangan dan perpaduan ummah. Peranan ulama salaf dan khalaf diterima dari generasi ke generasi berdasarkan tradisi keilmuan, maka penerimaan adat resam dalam kehidupan juga turut diiktiraf selagi tidak menyalahi syariah. Pengintegrasian *Fiqh al-Watan* dengan *Ahl al-Sunnah wa al-Jama'ah* dalam pentadbiran negara diaplikasikan dengan mengambil kira konteks sejarah, budaya tempatan dan undang-undang bagi memastikan kedaulatan, keamanan dan kelestarian negara terjamin. Pendekatan ini sekali gus menjadi benteng pertahanan akidah dan syariah demi kelestarian negara.

Kata Kunci: Akidah, *Ahl al-Sunnah wa al-Jama'ah*, *Fiqh al-Watan*, Kelestarian Negara.

Abstract: The creed of *Ahl al-Sunnah wa al-Jamā'ah* constitutes the principal doctrinal foundation of the majority of Muslims, grounded in the methodological legacy (*manhaj*) of the early (*salaf*) and later (*khalaf*) scholars and transmitted across generations. When examined within the framework of *Fiqh al-Waṭan*, understood as a jurisprudential approach to life within the homeland, this creed holds significant potential to align state governance with the objectives and symbols of Islam. Contemporary challenges and threats confronting Muslim societies have reached a concerning level due to the proliferation of opposition and deviant ideologies. This situation renders the *Ahl al-Sunnah wa al-Jamā'ah* approach, grounded in *Fiqh al-Waṭan*, an essential necessity for safeguarding religion and maintaining social stability. This study adopts a qualitative research design employing inductive, deductive, and comparative content analysis methods to generate its findings. The findings demonstrate that the *Ahl al-Sunnah wa al-Jamā'ah* paradigm, when articulated through *Fiqh al-Waṭan*, rejects all forms of extremism by upholding the principle of *wasatiyyah* (moderation), which fosters balance and unity.

within the Muslim community. The authority and role of the *salaf* and *khalaf* scholars are continuously acknowledged across generations through established scholarly traditions; accordingly, the acceptance of local customs and social practices is also recognised, provided that they do not contravene Islamic law. The integration of *Fiqh al-Waṭan* with the creed of Ahl al-Sunnah wa al-Jamā'ah in state administration is implemented with due consideration of historical contexts, local cultures, and legal frameworks in order to ensure sovereignty, peace, and national sustainability. This approach simultaneously functions as a protective framework for creed and Shari'ah, thereby contributing to the long-term sustainability of the nation.

Keywords: Islamic Creed, Ahl al-Sunnah wa al-Jamā'ah Thought, Fiqh al-Waṭan, National Sustainability.

Cite This Article:

Nurul Husna Mohd Pidrus, Mohd Hasrul Shuhari, Muhammad Rashidi Wahab, Nor Faridah Mat Nong & Muhammad Hafizi Rozali. (2025). Akidah Ahl Al-Sunnah Wa Al-Jama'ah Dalam Konteks Fiqh Al-Watan Bagi Pembinaan Kelestarian Negara [The Ahl Al-Sunnah Wa Al-Jamā'ah Creed And Fiqh Al-Waṭan: A Framework For National Sustainability]. *International Journal of Advanced Research in Islamic Studies and Education (ARISE)*, 5(1): 186-198.

PENGENALAN AHL AL-SUNNAH WA AL-JAMA'AH

Perkataan *ahl* bermaksud keluarga, pengikut atau golongan tertentu. *Al-Sunnah* dari segi bahasa ialah sirah, jalan atau perilaku. Manakala menurut ulama akidah, *al-sunnah* ialah petunjuk atau *hidayah* mengikut Rasulullah SAW selari dengan perintah Allah SWT sebagai ikutan dan pegangan. Jika digabungkan istilah *Ahl al-Sunnah wa al-Jama'ah* merujuk kepada golongan yang berpegang dan mendukung sunnah Rasulullah SAW. Definisi umumnya adalah kumpulan majoriti dalam kalangan ulama Islam yang mengikut jalan Rasulullah SAW dan para sahabat dalam mempraktikkan ajaran Islam merangkumi akidah, fiqh dan akhlak (Al-Asy'ari, 1432; Muhammad Rashidi, 2018).

Ahl al-Sunnah wa al-Jama'ah tidak terkeluar daripada fahaman salaf yang mengamalkan Al-Quran dan berpegang teguh kepada hadis. Disebabkan itu, mereka adalah salaf yang dimaksudkan oleh Nabi SAW kerana mengikut jejak langkah *salafussoleh* (al-Asy'ari, 1432). Inilah pengertian yang lebih khusus terhadap *Ahl al-Sunnah wa al-Jama'ah* iaitu kelompok yang terpelihara daripada fahaman menyimpang. Semua golongan yang menyeleweng seperti Khawarij, Jahmiyyah, Qadariyyah, Mu'tazilah, Murji'ah, Rafidah dan lain-lain golongan bidaah yang mengikut jalan kesesatan terkeluar daripada kelompok in (al-Asy'ari, 1413). Imam Ahmad RA (m. 241H) mentakrifkan *Ahl al-Sunnah wa al-Jama'ah* sebagai *al-taifah al-mansurah* kerana dianggap ahli hadis. Kumpulan ini juga digelar *firqah najiyah* disebabkan terselamat daripada azab api neraka disebabkan mengikut ajaran Al-Quran dan hadis (Al-Asy'ari, 1413; Engku Ahmad Zaki, 2007).

Catatan sejarah merekodkan, tarikh sebenar kemunculan dan pengasas *Ahl al-Sunnah wa al-Jama'ah* tidak diketahui disebabkan kewujudannya tidak disabitkan atas apa-apa kepentingan seperti mana kelompok Syiah dan Khawarij yang muncul atas dasar politik (Engku Ahmad Zaki, 2007). Istilah *Ahl al-Sunnah wa al-Jama'ah* telah masyhur digunakan pada abad ketiga dan keempat hijrah yang membezakannya dengan aliran bidaah (Mohd Azhar & Irawan

Mohd Subri, 2022). Golongan ini telah wujud pada zaman awal Islam dikenali dengan nama *Ahl Sunnah* yakni satu kelompok yang menolak hujah-hujah golongan Mu'tazilah (al-Shaybani, t.t). Di Malaysia, kumpulan *Ahl al-Sunnah wa al-Jama'ah* mewakili golongan al-Asy'ari (m. 324 H) dan al-Maturidi (m. 333H). Kelompok ini sangat berpengaruh di Malaysia pada masa kini dan telah wujud lama di Alam Melayu sejak abad ke-15 Masihi (Shukri Ahmad et al., 2018).

Di samping itu, setiap negeri di Malaysia mempunyai fatwa berhubung pengamalan *Ahl al-Sunnah wa al-Jama'ah*.

Bil	Keputusan/Fatwa/Warta	Negeri
1.	*Warta Kerajaan Negeri Johor 25 Oktober 2016. *Enakmen Pentadbiran Agama Islam (Negeri Johor) 2023.	Johor
2.	*Warta Kerajaan Negeri Pahang Fatwa Menangani Amalan-Amalan Khilafiah Yang Didakwa Sebagai Bidaah Dholalah (Sesat) 04 Ogos 2016. *Enakmen Kesalahan Jenayah Syariah 2013 Negeri Pahang : Seksyen 13 Enakmen Kesalahan Jenayah Syariah 2013. *Enakmen Pentadbiran Undang-Undang Islam 1991.	Pahang
3.	*Warta Kerajaan Negeri Kedah Darul Aman 10 November 2016. *Undang-Undang Tubuh Negeri Kedah 1959.	Kedah
4.	*Enakmen Pentadbiran Agama Islam (Perak) 2004.	Perak
5.	*Warta Kerajaan Negeri Selangor Fatwa Menangani Persoalan Bid'ah Dalam Masyarakat Ikhtilaf Perkara Furū' 17 Julai 2014. *Enakmen Pentadbiran Agama Islam (Negeri Selangor) 2003.	Selangor
6.	*Keputusan Fatwa Muzakarah Jawatankuasa Fatwa Negeri Sembilan 27 September 2017. *Keputusan Fatwa Muzakarah Jawatankuasa Fatwa Negeri Sembilan 25 Februari 2016. *Enakmen Pentadbiran Agama Islam (Negeri Sembilan) 2003.	Negeri Sembilan
7.	*Undang-Undang Perlembagaan Tubuh Kerajaan Kelantan. *Enakmen Majlis Agama Islam Dan Adat Istiadat Kelantan 1994.	Kelantan
8.	*Enakmen Pentadbiran Hal Ehwal Agama Islam (Terengganu) 2001.	Terengganu
9.	*Warta Kerajaan Negeri Sabah Keputusan Majlis Fatwa Negeri Sabah Mengenai Pegangan Akidah <i>Ahl al-Sunnah wa al-Jama'ah</i> 07 September 2017. *Keputusan Muzakarah Fatwa Negeri Sabah Bagi Menghalang Pembidaahan Penghinaan Kepada Amalan-Amalan ASWJ 23-24 Mei 2017. *Enakmen Majlis Ugama Islam Negeri Sabah 2004. *Enakmen Pentadbiran Undang-Undang Islam 1992.	Sabah
10.	*Enakmen Pentadbiran Agama Islam (Negeri Melaka) 2002.	Melaka

	*Enakmen Pentadbiran Agama Islam (Negeri Melaka) (Pindaan) 2021.	
11.	*Ordinan Majlis Agama Islam Sarawak 2001.	Sarawak
12.	*Enakmen Pentadbiran Agama Islam (Pulau Pinang) 2004.	Pulau
	*Fatwa Negeri Pulau Pinang Menghalang Pembidahan Kepada Amalan- Amalan <i>Ahl al-Sunnah wa al-Jama'ah</i> 05 Mac 2015.	Pinang
13.	*Undang-Undang Tubuh Kerajaan Perlis	Perlis
14.	*Akta Pentadbiran Undang-Undang Islam (Wilayah-Wilayah Persekutuan) 1993.	Wilayah Persekutuan
	*Kaedah-Kaedah Pentadbiran Undang-Undang Islam (Wilayah- Wilayah Persekutuan) (Tauliah Mengajar Agama Islam) 2006.	

PRINSIP-PRINSIP AHL AL-SUNNAH WA AL-JAMA'AH

Dalam konteks Islam, terdapat beberapa prinsip *Ahl al-Sunnah wa al-Jama'ah* berpegang teguh kepada Al-Quran, hadis, ijmak dan qiyas sebagai sumber utama dalam memahami akidah, syariah dan akhlak. Meyakini bahawa Al-Quran merupakan *kalam* Allah SWT yang menjadi petunjuk umat Islam dalam menjalani kehidupan, manakala hadis adalah penjelasan dan huraian daripada Rasulullah SAW terhadap kandungan Al-Quran. *Ahl al-Sunnah wa al-Jama'ah* turut mengiktiraf peranan akal untuk mentafsir teks wahyu yang tidak diketahui maknanya secara zahir sebagai penyelesaian terhadap masalah kontemporari. Oleh itu, *Ahl al-Sunnah wa al-Jama'ah* menolak sebarang tafsiran yang bercanggah dengan nas sahih serta mengutamakan kefahaman para sahabat dan ulama dalam memahami teks agama (Al-Shaybani, t.th; Nur Bakri & Naufal Ahmad, 2023).

Selain itu, *Ahl al-Sunnah wa al-Jama'ah* mengamalkan pendekatan *wasatiyyah* iaitu sikap pertengahan, seimbang dan adil dalam semua aspek kehidupan tanpa cenderung kepada ekstrem atau melampau. Prinsip ini berasaskan kepada keseimbangan antara keperluan dunia dan akhirat, akal dan wahyu, serta hak masyarakat dan negara. Elemen *wasatiyyah* melahirkan umat Islam yang berfikir matang, menghormati perbezaan dan mengutamakan perpaduan serta keharmonian (Syed Hadzrullathfi & Nurul Aarifah, 2018).

Di samping itu, *Ahl al-Sunnah wa al-Jama'ah* menekankan kesatuan yang membentuk keharmonian dalam mengamalkan ajaran agama. Kesatuan diperoleh melalui keselarasan dalam satu pegangan yang dapat membentuk kesepaduan dan pengekal keharmonian dalam masyarakat. Disebabkan itu, permasalahan berkenaan perkara usul mestilah dielakkan demi menjaga kemaslahatan bersama. Di samping isu *furu'* dibincangkan secara berhemah, bertolak ansur dan berhati-hati. *Ahl al-Sunnah wa al-Jama'ah* sentiasa menekankan adab dalam perbezaan pandangan kerana ia ijtihad ilmu yang sering menyebabkan pertelagahan sesama Muslim sejak zaman dahulu sehingga kini (Khairunneezam Mohd Noor, 2023). Allah SWT berfirman SWT dalam Surah Ali 'Imran ayat 103 yang bermaksud: "*Dan berpeganglah kamu semuanya kepada tali Allah SWT dan janganlah kamu bercerai-berai.*"

Seterusnya, *Ahl al-Sunnah wa al-Jama'ah* mengamalkan pegangan bermazhab dalam perkara berkaitan akidah, feqah dan tasawwuf. Dalam bab akidah mengikut mazhab Imam Abu Hasan al-Asy'ari (m.324H) dan Imam Abu Mansuri al-Maturidi (m.333H). Sementara, bagi

mazhab fiqh adalah Imam Syafi'i (m.204H), Imam Malik (m.179H), Imam Abu Hanifah dan Imam Ahmad bin Hanbal (m.241H). Manakala mazhab tasawuf mengikut Imam al-Ghazali (m.505H) dan Imam Junaid al-Baghdadi (m.297H) atau para ulama muktabar yang lain. Pengamalan bermazhab di Malaysia bertujuan untuk mengekalkan keharmonian dan memudahkan pengajaran. Ikutan bermazhab dapat menjadi sandaran dan petunjuk kepada masyarakat untuk mengamalkan ajaran Islam agar tidak terjerumus kepada fahaman-fahaman yang menyeleweng (Mohd Azhar Abdullah, Irwan Mohd Subri, 2022).

PENERAPAN *FIQH AL-WATAN* DALAM TATACARA KENEGARAAN

Tanggungjawab umat Islam dalam memelihara negara adalah kesempurnaan dalam ajaran Islam. Dalam kehidupan bermasyarakat, individu memerlukan ilmu dan pengamalan menurut syariat Islam yang dikenali sebagai *Fiqh al-Watan*. Konsep ini terdiri daripada dua aspek utama, iaitu "Fiqh" pemahaman mendalam terhadap sesuatu perkara dan "Watan" merujuk kepada tanah air, sama ada tempat kelahiran atau tempat tinggal. *Fiqh Al-Watan* ditakrifkan sebagai ilmu dan amalan mengenai cara-cara memerintah dan mentadbir negara berdasarkan akidah (iman), syariah (hukum) dan akhlak Islam. Ia penting untuk menangani perkembangan dan keperluan semasa dalam memelihara kedaulatan, keharmonian dan kelestarian negara tanpa mengetepikan sejarah dan budaya tempatan yang telah wujud sejak sekian lama (Jabatan Mufti Negeri Pahang, 2025).

Kenyataan ini bersesuaian dengan hadis Jibril riwayat Imam Muslim berkenaan penekanan terhadap iman, Islam dan Ihsan:

عَنْ عُمَرَ أَيْضًا قَالَ: "... وَقَالَ: يَا مُحَمَّدُ أَخْبِرْنِي عَنِ الْإِسْلَامِ. فَقَالَ رَسُولُ اللَّهِ الْإِسْلَامُ أَنْ تَشْهَدَ أَنْ لَا إِلَهَ إِلَّا اللَّهُ وَأَنَّ مُحَمَّدًا رَسُولُ اللَّهِ، وَتُقِيمَ الصَّلَاةَ، وَتُؤْتِيَ الزَّكَاةَ، وَتَصُومَ رَمَضَانَ، وَتَحُجَّ الْبَيْتَ إِنْ اسْتَطَعْتَ إِلَيْهِ سَبِيلًا. قَالَ: صَدَقْتَ. فَعَجِبْنَا لَهُ يَسْأَلُهُ وَيُصَدِّقُهُ! قَالَ: فَأَخْبِرْنِي عَنِ الْإِيمَانِ. قَالَ: أَنْ تُؤْمِنَ بِاللَّهِ وَمَلَائِكَتِهِ وَكُتُبِهِ وَرُسُلِهِ وَالْيَوْمِ الْآخِرِ، وَتُؤْمِنَ بِالْقَدَرِ خَيْرِهِ وَشَرِّهِ. قَالَ: صَدَقْتَ. قَالَ: فَأَخْبِرْنِي عَنِ الْإِحْسَانِ. قَالَ: أَنْ تَعْبُدَ اللَّهَ كَأَنَّكَ تَرَاهُ، فَإِنْ لَمْ تَكُنْ تَرَاهُ فَإِنَّهُ يَرَاكَ. قَالَ: فَأَخْبِرْنِي عَنِ السَّاعَةِ. قَالَ: مَا الْمَسْئُولُ عَنْهَا بِأَعْلَمَ مِنَ السَّائِلِ. قَالَ: فَأَخْبِرْنِي عَنْ أَمَارَاتِهَا؟ قَالَ: أَنْ تَلِدَ الْأُمَةُ رَبَّتَهَا، وَأَنْ تَرَى الْخِفَاءَ الْعُورَةَ الْعَالَةَ رِعَاءَ الشَّاءِ يَتَطَاوَلُونَ فِي الْبُنْيَانِ. ثُمَّ انْطَلَقَ، فَلَبِسْنَا مَلِيًّا، ثُمَّ قَالَ: يَا عُمَرُ أَتَدْرِي مَنْ السَّائِلُ؟ قُلْتُ: اللَّهُ وَرَسُولُهُ أَعْلَمُ. قَالَ: فَإِنَّهُ جِبْرِيلُ أَتَاكُمْ يُعَلِّمُكُمْ دِينَكُمْ“.

Maksudnya: Daripada Saidina Umar RA, katanya: ..., ia berkata: "Wahai Muhammad, ceritakan kepadaku tentang Islam." Lalu Rasulullah SAW menjawab, "Islam itu ialah kamu menyaksikan bahawa tiada Tuhan yang disembah melainkan Allah dan Muhammad adalah Pesuruh Allah, kamu mendirikan Solat, mengeluarkan Zakat, dan menunaikan Haji jika kamu mampu mengerjakannya." Lelaki itu berkata, "Benarlah kamu!" Kami merasa hairan terhadapnya, dia bertanya dan dia juga yang membenarkannya. Lelaki itu berkata lagi, "Ceritakan kepadaku tentang Iman." Lalu Baginda SAW bersabda, "Bahawa kamu beriman kepada Allah, para Malaikat-Nya, Kitab-kitab-Nya, Rasul-rasul-Nya, Hari Kiamat dan kamu beriman dengan

ketentuan Baik dan BurukNya.” Lelaki itu berkata, “Benarlah kamu!” Dia berkata lagi, “Ceritakan kepadaku tentang Ihsan.” Lalu Baginda SAW menjawab, “Bahawa kamu beribadah kepada Allah seolah-olah kamu melihatnya. Jika kamu tidak melihatnya, sesungguhnya Allah melihat kamu.” Lelaki itu berkata, “Benarlah kamu!” Dia berkata lagi, “Ceritakan kepadaku tentang Hari Kiamat.” Lalu Baginda SAW menjawab, “Orang yang ditanya tidak lebih mengetahui daripada orang yang bertanya” (maksudnya kedua-duanya tidak tahu bila berlakunya Hari Kiamat). Lelaki itu berkata lagi, “Ceritakan kepadaku tentang tanda-tandanya.” Lalu Baginda menjawab, “Apabila hamba perempuan melahirkan tuannya. Dan apabila kamu melihat orang yang tidak berkasut, tidak berbaju, miskin dan penggembala kambing berlumba-lumba membina bangunan.” Kemudian lelaki itu pun pergi. Maka aku pun menunggu beberapa hari. Kemudian Rasulullah SAW berkata, “Wahai Umar, tahukah kamu siapakah orang yang bertanya itu?” Aku menjawab, “Allah dan Rasul-Nya lebih mengetahui.” Sabda Rasulullah SAW, “Sesungguhnya beliau adalah Jibril. Beliau datang untuk mengajar kamu tentang al-Din kamu.”

Konsep *al-Watan* menuntut semua warganegara dipandang sama tanpa sebarang perbezaan tiada majoriti atau minoriti yang menuntut kesamarataan di sisi undang-undang. Pendekatan ini juga sebagai reaksi balas terhadap isu berkaitan kewarganegaraan, hubungan sosial antara kepelbagaian fahaman dan kepimpinan politik (Muh. Sholihuddin, 2021). Gambaran dalam fiqh Islam mengenai kesatuan umat dan negara Islam menunjukkan usaha memartabat *Fiqh al-Watan* bagi menangani cabaran kontemporari seperti keraguan terhadap sistem Raja berperlembagaan, penolakan terhadap ulama tempatan, peminggiran terhadap warisan hukum dan ancaman ideologi menyeleweng (Wan Ahmad Fauzi, 2023).

Amran Muhammad (2025) membahagikan kehidupan bernegara kepada tiga bidang utama: pertama, politik dan pentadbiran; sosial dan budaya; dan alam sekitar dan ekonomi. *Fiqh al-Watan* dalam konteks di Malaysia merangkumi institusi kesultanan sebagai ketua pemerintahan negeri, adat resam dan budaya sebagai cara hidup penduduk tempatan, serta alam sekitar sebagai sumber kemajuan ekonomi dan perindustrian. Dalam politik dan pentadbiran, sultan adalah ketua negara dan agama yang wajib ditaati oleh rakyat. Kedudukan ini mencerminkan kesinambungan tradisi pemerintahan Islam yang berasaskan kepimpinan, syura dan ketaatan kepada pemimpin yang sah. Dalam sosial dan budaya, *Fiqh al-Watan* memelihara identiti bangsa Islam dengan menyokong adat dan tradisi masyarakat yang diwarisi secara turun temurun. Pengamalan adat resam selaras dengan fiqh “*al-‘adah muhakkamah*” yang membenarkan adat diterima selagi mana tidak bertentangan dengan syaria. Dalam aspek alam sekitar dan ekonomi, *Fiqh al-Watan* menjunjung tinggi kelestarian alam sekitar yang dipertanggungjawabkan kepada manusia sebagai khalifah. Pengurusan alam sekitar yang beretika dianggap asas kepada kemajuan ekonomi dan industri yang berterusan.

CIRI-CIRI PERLAKSANAAN *FIQH AL-WATAN*

Ibrahim Majdi (2025) dan Azman Yusof et al. (2025) menggariskan beberapa ciri-ciri *Fiqh al-Watan*. Pertama, penekanan *maqasid al-syariah* dalam pemerintahan bagi memastikan hukum Islam tertegak berlandaskan lima matlamat utama iaitu memelihara agama (*hifz al-din*), nyawa (*hifz al-nafs*), akal (*hifz al-‘aql*), keturunan (*hifz al-nasl*) dan harta (*hifz al-mal*). Prinsip ini

perlu diaplikasikan dalam undang-undang dan pemerintahan secara dinamik dan kontekstual dengan meraihan ijtihad dan syura dalam penetapan hukum supaya selaras dengan perubahan zaman dan keperluan masyarakat kontemporari.

Kedua, *Fiqh al-Watan* memberi tumpuan kepada ijtihad semasa melalui pendekatan *tahqiq al-manat*, pengiktirafan uruf sah dan kebijaksanaan ulama. Pelaksananya melibatkan penerimaan terhadap adat resam dan organisasi sosial masyarakat Melayu seperti sistem kesultanan dan institusi penghulu sebagai ketua masyarakat selagi mana tidak bercanggah dengan Islam. Perihal ini menunjukkan pelaksanaan *Fiqh Al-Watan* boleh diaplikasikan kepada semua masyarakat bukan terhad kepada masyarakat Arab sahaja dan prinsip ini mampu disesuaikan dengan masyarakat setempat.

Ketiga, *Fiqh al-Watan* melaksanakan hukum Islam secara *kaffah* iaitu menyeluruh merangkumi semua aspek kehidupan termasuk ibadah, sosial, ekonomi dan pemerintahan. Perlaksanaannya saling melengkapi antara urusan dunia dan akhirat tanpa memisahkannya. Sebagai contoh, memasukkan pelaksanaan hukum syariah di dalam Hukum Kanun Pahang yang dirangka dalam pentadbiran negeri. Hubungan erat antara ulama dan pemerintah diperlukan kerana ulama berperanan sebagai penasihat, mufti dan hakim yang memandu pemerintah menggubal undang-undang selaras dengan prinsip syariah Islam. Keadaan ini mempamerkan *Fiqh al-Watan* tidak hanya membincangkan berkenaan teori tetapi diterjemahkan dalam undang-undang dan institusi sosial.

Keempat, *Fiqh al-Watan* mengaplikasikan pendekatan *wasatiyyah* iaitu pendekatan sederhana, seimbang dan adil dalam segala aspek kehidupan. Pendekatan ini merangkumi keseimbangan antara dunia dan akhirat, antara perkara tetap (*thawabit*) dan boleh berubah (*mutaghayyirat*), serta antara pendidikan dan hukuman dalam proses pentadbiran negara. *Wasatiyyah* memperlihatkan *Fiqh al-Watan* bukan sekadar alat hukuman bahkan sistem tadbir urus yang berlandaskan Islam yang penuh rahmat dan keadilan bersesuaian dengan prinsip *maqasid al-syariah*. Pendekatan ini menatijahkan adab terhadap ilmu, sejarah dan institusi agama sebagai paksi utama dalam pembentukan hukum.

KEPENTINGAN *FIQH AL-WATAN*

Kepentingan *Fiqh al-Watan* menurut (Azman Yusof, Ibrahim Majdi, 2025; Muh. Sholihuddin, 2021). Pertama, kepentingan terhadap epistemologi ilmu dengan cara mengembalikan keabsahan *turath* sebagai sumber rujukan yang diyakini dalam proses ijtihad kontemporari. Idea ini melibatkan penulisan semula sejarah hukum Islam yang telah dilenyapkan dan pembentukan semula ijtihad berasaskan maqasid, siyasah syariyyah dan realiti setempat. Perlunya memartabatkan kembali 'uruf sah dalam pembentukan hukum sebagai langkah penting terhadap pembinaan intelek yang lebih matang.

Kedua, *Fiqh al-Watan* berusaha memulihkan institusi-institusi Islam yang telah dilemahkan oleh penjajahan Barat seperti istana, mahkamah, jabatan agama dan jabatan mufti. Kesemua agensi ini sah dari sudut syariah Islam bagi memastikan kestabilan sosial dan berintegriti dalam mengeluarkan hukum Islam. Proses pemikiran tidak boleh berlegar sekitar ruang ilmu tetapi perlu memulihkan kembali autoriti badan-badan warisan Islam.

Ketiga, *Fiqh al-Watan* mengamalkan nilai-nilai Islam serta menghormati kedudukan ilmu dan tradisi. Penetapan hukum mestilah menekankan adab terhadap ilmu, hikmah dan *wasatiyyah* yang terhakis disebabkan pendidikan literal dan liberal. Nilai-nilai Islam perlu diterapkan berdasarkan konteks sejarah dan budaya Islam tempatan dengan cara mengiktiraf tarekat, ulama pondok dan pemeraksanaan fatwa yang terbukti membentuk masyarakat yang berhikmah dan beradab.

Keempat, *Fiqh al-Watan* menyumbang kepada pembentukan negara yang stabil dan harmoni melalui sistem Raja Berperlembagaan, pengiktirafan Islam sebagai agama persekutuan dan pengamalan ilmu akidah, fiqh dan tasawuf. Ini menunjukkan *Fiqh al-Watan* menerima proses *islah* (reformasi berperingkat) dan *tadarruj* (transformasi berhikmah) iaitu menerima perubahan dengan mengambil kira *maqasid al-syariah* dan kestabilan masyarakat.

Kelima, *Fiqh al-Watan* berperanan dalam pengamalan undang-undang, pendidikan dan budaya. Pembinaan undang-undang bukan sahaja melibatkan nas dan fiqh malah mengambil kira sejarah tempatan dan *maqasid al-syariah*. Dari aspek pendidikan, *Fiqh al-Watan* menghasilkan kurikulum pendidikan yang bukan hanya menghafal teks tetapi memahami peranan ulama dalam proses pembentukan hukum. Dari sudut budaya, *Fiqh al-Watan* mempamerkan Islam di Alam Melayu adalah sah, berdaulat dan diiktiraf dari aspek sejarah dan fiqh.

ANALISIS AHL AL-SUNNAH WA AL-JAMA'AH BERLANDASKAN FIQH AL-WATAN DALAM PEMBINAAN KELESTARIAN NEGARA

Pertama, memegang keutuhan autoriti dalam memahami agama dan pembinaan negara. *Ahl al-Sunnah wa al-Jama'ah* berpegang kepada sumber utama Islam iaitu Al-Quran, hadis, ijmak dan qiyas. *Kalam Allah* SWT adalah petunjuk utama, hadis sebagai penjelasan agama, ijmak menegakkan hukum yang tidak jelas di dalam nas dan qiyas menetapkan hukum baru berdasarkan prinsip yang terkandung dalam wahyu (Nuraini Sulaiman, 2019). *Fiqh al-Watan* merujuk nilai syariah dalam mentadbir negara berasaskan Islam dengan pengekaln epistemologi ilmu yang sama dalam membahaskan isu kenegaraan seperti hubungan rakyat dan pemerintah, perlaksanaan hukum kanun dan peranan ulama (Azman Yusof et al., 2025). Fenomena ini menunjukkan *Fiqh al-Watan* tidak terbina berdasarkan prinsip moden Barat sahaja tetapi selari dengan kerangka *Ahl al-Sunnah wa al-Jama'ah*. Keabsahan terhadap sumber ilmu diperlukan supaya mengelakkan kekeliruan dan menghasilkan natijah yang benar sekali gus mencegah liberalisi fiqh, relativisme undang-undang dan penolakan terhadap ulama.

Kedua, pengamalan konsep *wasatiyyah* dalam kefahaman agama dan kehidupan bernegara. *Ahl al-Sunnah wa al-Jama'ah* mengutamakan prinsip *wasatiyyah* iaitu keadilan, kesederhanaan dan keseimbangan. Pendekatan seimbang yakni tidak terlalu longgar dan tidak terlalu ketat (*baina tafrit wa ifrat*) dapat mengelakkan sikap ekstrem dan meraikan toleransi dalam kepelbagaian (Majlis Agama Islam Selangor (MAIS), 2015). *Fiqh al-Watan* mengaplikasikan nilai *wasatiyyah* iaitu keseimbangan antara hak rakyat dan pemerintah, adat dan syarak, perubahan sosial dan kemampunan prinsip agama. Hak rakyat dan pemerintah diseimbangkan supaya tidak berlaku penindasan dan kezaliman, sementara penghormatan terhadap adat resam dan syarak diraikan supaya mengelakkan konflik dan meraikan

kebudayaan setempat (Azman Yusof et al., 2025). Perkongsian orientasi *wasatiyyah* menjamin keutuhan Islam yang *rahmatan lil alamin* selari dengan *maqasid al-syariah* yang inklusif dan *syumul*.

Ketiga, penolakan terhadap kesesatan dan ideologi yang bercanggah dengan ajaran Islam sebenar. *Ahl al-Sunnah wa al-Jama'ah* menolak fahaman yang menyimpang seperti ajaran klasik Mu'tazilah, Khawarij, Musyabbihah, Mujassimmah dan ideologi semasa seperti Liberalisme, Ekstremisme, Pluralisme, Literalisme dan kesemua doktrin menyeleweng (Amran Muhammad, 2025). *Fiqh al-Watan* menolak perpecahan yang berlaku dalam kalangan agama dan kaum yang pelbagai. Ia menentang segala bentuk persenjataan, pemberontakan ideologi dan anasir luar yang menjadi ancaman kepada kestabilan negara serta kemudaratannya kepada masyarakat (Azman Yusof et al., 2025). Hubungan ini menunjukkan kesepaduan *Ahl al-Sunnah wa al-Jama'ah* dan *Fiqh al-Watan* dalam usaha mempertahankan agama dan nilai-nilai Islam dapat terus dipraktikkan dalam suasana harmoni dan berintegriti. Kelompok ini menolak sebarang bentuk kekerasan yang dibawa oleh gerakan militan dan ideologi radikal yang mencabar sosial negara Islam.

Keempat, meraikan dan mengiktiraf kepentingan ijtihad yang merupakan proses intelektual dalam menyesuaikan hukum Islam berdasarkan realiti semasa. *Ahl al-Sunnah wa al-Jama'ah* meraikan ijtihad ulama supaya memperoleh kefahaman yang mendalam berdasarkan sumber asal dan mengadaptasinya mengikut perubahan kontemporari tanpa meminggirkan prinsip asas Islam (Abd Muhaimin & Indal Abror, 2023). *Fiqh al-Watan* mengaplikasikan prinsip ini dalam perundangan dan pentadbiran negara agar ia selari dengan realiti tempatan. Pendekatan ini membuka ruang kepada negara untuk membentuk undang-undang bersesuaian dengan syarak dan adat tanpa bersikap rigid dan kaku. Ijtihad diperlukan agar ajaran Islam bersikap praktikal sesuai dengan tuntutan zaman dan mampu menyelesaikan masalah kontemporari berdasarkan keperluan masyarakat semasa.

Kelima, menghormati dan mengamalkan tradisi Islam dan masyarakat selagi mana tidak bertentangan dengan syariah. *Ahl al-Sunnah wa al-Jama'ah* mengiktiraf adat resam dan budaya seperti prinsip *Fiqh al-Watan* selagi mana tidak bercanggah dengan syariat. *Fiqh al-Watan* mengangkat sebahagian adat masyarakat Melayu yang dipraktikkan dalam perundangan dan pengurusan seperti yang termaktub dalam peraturan Raja-raja Melayu dan warisan hukum seperti Hukum Kanun Melaka (Jabatan Mufti Negeri Pahang, 2025).

Keenam, suasana harmoni berdasarkan kesepakatan dan kesepaduan pegangan dalam kalangan masyarakat dan aspek kenegaraan. *Ahl al-Sunnah wa al-Jama'ah* yang berasaskan fahaman al-Asy'ari (m. 324 H) dan al-Maturidi (m. 333H) menjadi teras perpaduan umat Islam di Malaysia. Kesepakatan dan keselarasan menghasilkan masyarakat yang harmoni, bersatu pada dan tersusun yang menyumbang kepada kestabilan sosial. *Ahl al-Sunnah wa al-Jama'ah* bersepakat menolak sebarang bentuk pendekatan ekstrem yang menyebabkan perpecahan masyarakat (Azmil Zainal Abidin, 2017). Sebaliknya, menggalakkan toleransi dan amar makruf nahi mungkar sebagai cara pengukuhan suasana aman damai. Dalam konteks *Fiqh al-Watan*, kesepaduan diperkukuh dengan menjaga *maqasid al-syariah* iaitu pemeliharaan agama, nyawa, akal, keturunan dan harta. Penerapan terhadap *maqasid* adalah melalui penyusunan undang-undang, pentadbiran syariah, pengurusan keselamatan, pendidikan dan ekonomi negara yang dibina dengan mengambil kira maslahat umum (Ibrahim Majdi et al., 2025). *Fiqh al-Watan*

menjadikan konsep musyawarah dalam perbincangan mengenai urus tadbir negara bagi memastikan keadilan dan kelestarian.

Ketujuh, meraikan peranan ulama sebagai sumber dalam pelaksanaan hukum Islam. *Ahl al-Sunnah wa al-Jama'ah* menempatkan ulama sebagai pewaris nabi (*warathat al-anbiya'*) berperanan menjaga akidah dan syariat Islam. Ulama *Ahl al-Sunnah wa al-Jama'ah* merupakan rujukan utama dalam melakukan fatwa, pengajaran ilmiah dan penyebaran dakwah (Mohd Fauzi Hamat et al., 2019). Mereka berperanan mengukuhkan kedudukan Asyairah dan Maturidiah dalam kefahaman akidah masyarakat dan aktif dalam membanteras ideologi ekstrem yang mengancam kesucian akidah Islam. Dalam konteks *Fiqh al-Watan*, ulama memikul peranan sebagai penasihat agama kepada pemerintah sebagai penentu hukum dan penyokong pentadbiran Islam. Agama dan kuasa kenegaraan saling berkait rapat menyebabkan *Fiqh al-Watan* mengukuhkan kedudukan ulama melalui institusi fatwa, Majlis Raja-raja dan penetapan hukum berlandaskan ajaran Islam (Ibrahim Majdi et al., 2025). Pemeliharaan terhadap usaha ulama melahirkan gagasan urus tadbir berasaskan nilai Islam dan memberi legitimasi kepada autoriti ulama dalam urus tadbir kenegaraan bersesuaian dengan prinsip *Ahl al-Sunnah wa al-Jama'ah*. *Fiqh al-Watan* telah membentuk integrasi antara keilmuan ulama dan kuasa politik yang sah.

Kelapan, penggabungan tiga elemen utama Islam iaitu akidah, fiqh dan akhlak dalam keseluruhan ajaran Islam untuk membentuk Islam yang sempurna. Akidah menjadi paksi keimanan yang kukuh dalam rukun iman, fiqh merupakan penetapan hukum syarak sebagai panduan praktikal pengamalan Islam dalam kehidupan dan akhlak adalah manifestasi akidah dan fiqh dalam pembentukan peribadi (Halimi Mohd Khalid et al., 2022). *Ahl al-Sunnah wa al-Jama'ah* mempraktikkan tiga elemen ini secara serentak kerana ia saling melengkapi, serta ajaran Islam tidak hanya dibincangkan aspek teori malah menyentuh aspek spiritual dan sosial. Seiring dengan *Fiqh al-Watan* meliputi aspek pentadbiran, adat resam dan alam sekitar perlu dikaitkan dengan tiga elemen ini (Jabatan Mufti Negeri Pahang, 2025). Dengan demikian, penetapan hukum Islam tidak hanya berdasarkan teks tetapi mengambil kira konteks budaya dan keperluan masyarakat. *Fiqh al-Watan* merangkumi pengamalan Islam secara menyeluruh dengan mengintegrasikan akidah, fiqh dan akhlak dalam konsep bernegara dan bermasyarakat. Pendekatan ini menunjukkan keseimbangan antara agama dengan realiti semasa demi memperkukuh keamanan sejagat.

Kesembilan, kewajipan kepada masyarakat untuk mentaati pemerintah yang sah. *Ahl al-Sunnah wa al-Jama'ah* mewajibkan pengikutnya untuk patuh kepada pemerintah selagi mana tidak menyuruh melakukan maksiat, fitnah masyarakat dan keruntuhan ummah (Muhammad Rashidi Wahab & Mohd Fauzi Hamat, 2018). Pemerintah dianggap sebagai ulil amri sebagaimana firman Allah SWT yang bermaksud “wahai orang-orang yang beriman, taatilah Allah SWT dan taatilah RasulNya dan ulil amri di antara kamu (Surah al-Nisa' (4): 59). *Fiqh al-Watan* pula membina konsep kewarganegaraan Islam yang berstruktur dengan ketaatan kepada Raja, kerajaan dan undang-undang. Pemeliharaan terhadap negara bukan hanya bersifat perundangan, malah ia ibadah dan tanggungjawab moral.

KESIMPULAN

Ahl al-Sunnah wa al-Jama'ah merupakan pegangan utama umat Islam berasaskan manhaj para ulama salaf dan khalaf yang diintegrasikan dengan prinsip *Fiqh Al-Watan*. Pengintegrasian *Ahl al-Sunnah wa al-Jama'ah* dan *Fiqh al-Watan* diperlukan untuk memelihara agama dan kestabilan sosial, serta melahirkan masyarakat yang berfikiran kritis, bersederhana dan sentiasa mengutamakan agama dalam setiap aspek kehidupan. Pendekatan ini juga menegaskan kepentingan mendaulatkan negara Islam dengan pentadbiran berlandaskan akidah, syariah dan akhlak tanpa meminggirkan konteks sejarah, budaya dan undang-undang tempatan. Institusi kesultanan, adat resam masyarakat dan kelestarian alam sekitar menjadi asas penting dalam melaksanakan *Fiqh Al-Watan* yang menyeluruh dari aspek politik, sosial dan ekonomi. Dalam menghadapi cabaran kontemporari, pegangan *Ahl al-Sunnah wa al-Jama'ah* melalui *Fiqh Al-Watan* menjadi benteng memperkukuh diri dan mempertahankan negara demi kesejahteraan, perpaduan dan kelestariannya.

PENGHARGAAN

Kami ingin merakamkan setinggi-tinggi penghargaan kepada Institut Ilmu Darul Makmur dan Majlis Ugama Islam dan Adat Resam Melayu Pahang atas pembiayaan geran penyelidikan bagi projek UniSZA/2025/PPL/IIDM(036). Kami juga ingin menyampaikan ucapan terima kasih kepada Pusat Pengurusan Kecemerlangan & Inkubator Penyelidikan (CREIM) Universiti Sultan Zainal Abidin (UniSZA) dan Fakulti Pengajian Kontemporari Islam (FKI) UniSZA, atas sokongan dan kerjasama yang diberikan sepanjang pelaksanaan projek ini.

RUJUKAN

- Abd Muhaimin & Indal Abror. 2023. Transmisi Ideologi Fundamentalisme dalam Metode Ijtihad Hukum: Telaah Penafsiran al-Qur'an A.Hassan dalam Kitab al-Furqon. *Qof: Jurnal Studi Al-Qur'an dan Tafsir*, 5(1): 263–280. <https://doi.org/10.30762/qof.v7i2.1213>
- Al-Alusi, Abū al-Ma'ālī Maḥmūd Shukrī bin 'Abd Allāh. 1422. *Ghayat al-Amānī fī al-Radd 'alā al-Nabḥānī*. Riyadh: Maktabah al-Rushd.
- Al-Ash'arī, Abū al-Ḥasan 'Alī bin Ismā'īl. 1432. *al-Ibānah 'an Uṣūl al-Diyānah*. Riyadh: Dār al-Faḍīlah.
- Al-Asy 'ari, Abu al-Hasan 'Ali Ismail. 1413. *Risālah ilā Ahl al-Ṭagh̃r bi-Bāb al-Abwāb*. Madinah: Dewan Penyelidikan Ilmiah, Universiti Islam Madinah.
- Al-Shaybānī, Abū 'Abd Allāh Aḥmad bin Muḥammad bin Ḥanbal. t.th. *al-Radd 'alā al-Jahmiyyah wa al-Zanādiqah*. Riyadh: Dār al-Thabāt.
- Amran Muhammad. 2025. *Fiqh al-Watan (Tatacara Kehidupan Bertanah Air Ahli Sunnah Wal Jamaah)*. Institut Ilmu Darul Makmur. <https://www.iidmmuip.com/berita-iidm/fiqh-al-watan-tatacara-kehidupan-bertanah-air-ahli-sunnah-wal-jamaah/>
- Azman Yusof, Ibrahim Majdi Mohd kamil, Amran Muhammad & Rahimin Affandi Abdul Rahim. 2025. Fiqh Al-Watan dan Legitimasi Islam Tempatan: Satu Kerangka Dekolonisasi. *International Journal of the Malay World and Civilisation*, 13(3): 53–64.

- Azmil Zainal Abidin. 2017. Keautoritarian Manhaj Ahl al-Sunnah wa al-Jamā'ah: Induk dan Benteng Akidah Ummah. *Jurnal Akidah & Pemikiran Islam*, 19: 1–46. <https://doi.org/10.22452/afkar.sp2017no1.1>
- Diah Rusmala Dewi & Ghamal Sholeh Hutomo. 2020. Hikmah dan Nilai-nilai Pendidikan Adanya Ayat-ayat Muhkamat dan Mutasyabihat dalam Al-Qur'an. *Islamika: Jurnal Keislaman dan Ilmu Pendidikan*, 2(1): 63–83. <https://doi.org/10.36088/islamika.v2i1.426>
- Engku Ahmad Zaki Engku Alwi. 2007. Definisi Ahl al-Sunnah Wa al-Jama'ah: Satu Analisis. *Jurnal Usuluddin*, 25: 125–143.
- Engku Ahmad Zaki Engku Alwi. 2023. Akidah Ahli Sunnah Wa Al-Jamaah dan Cabaran Umat Islam di Malaysia. *ICONITIES: International Conference on Islamic Civilization and Humanities*, hal. 26–62.
- Halimi Mohd Khalid, Muhammad Rashidi Wahab, Shakila Ahmad & Mutapahayuddin Abdul Khalim. 2022. Analisis Epistemologi Islam Liberal Dalam Konteks Malaysia Menurut Ahli Sunnah Wal Jama'Ah. *Advances in Humanities and Contemporary Studies*, 3(2): 227–238. <https://doi.org/10.30880/ahcs.2022.03.02.021>
- Ibrahim Majdi Mohamad kamil, Azman Yusof, Maran Muhammad & Rahimin Affandi Abdul Rahim. 2025. Perkembangan Teori Fiqh Al-Watan Di Negeri Pahang: Satu Pemerhatian Epistemologikal. *IJWCPS: Internasioanl Journal of World Civilizations and Philosophical Studies*, 3(2): 171–186.
- Jabatan Mufti Negeri Pahang. 2025. *Teks Khutbah Negeri Pahang*.
- Khairunneezam Mohd Noor. 2023. *Perpecahan dan Perbalahan Pembunuh Kesejahteraan Ummah*. Universiti Sains Islam Malaysia. <https://fkip.usim.edu.my/perpecahan-dan-perbalahan-pembunuh-kesejahteraan-ummah/>
- Majlis Agama Islam Selangor (MAIS). 2015. Gejala Agnostik, Satu Ancaman Akidah. *Majlis Agama Islam Selangor (MAIS)*. <http://www.mais.gov.my/info-mais/informasi/penerbitan/muat-turun/77-gejala-acnostik-satu-ancaman-akidah/filea>
- Mohd Azhar Abdullah, Irwan Mohd Subri, Muhammad Lukman Ibrahim & Muhammad Amiril Abdul Ghani. 2022. Malaysia sebagai Negara yang Bermazhab: Satu Diskusi Awal Malaysia as a Madhhab Country: A Preliminary Discussion. *Jurnal Ilmu Wahyu (Journal of Revealed Knowledge)*, 3(1).
- Mohd Fauzi Hamat, Muhammad Rashidi Wahab, Che Zarrina Saari, Khadijah Mohd Khambali @ Hambali, Azmil Zainal Abidin, Syed Mohammad Hilmi Syed Abdul Rahman, Luqman Abdullah, Wan Adli Wan Ramli, Mohd Khairul Naim Che Nordin, F. A. L. dan M. K. S. (2019). Bidang Terhadap Penolakan Asha'irah Sebagai Ahl Al-Sunnah Wa al-Jama'ah. *Jurnal Al-Ummah*, 1: 1–36.
- Muh. Sholihuddin. 2021. Fiqh Al-Muwāṭanah: Nahdlatul Ulama's Interpretation About Citizenship. *Millah: Jurnal Studi Agama*, 21(1): 149–182. <https://doi.org/10.20885/millah.vol21.iss1.art6>
- Muhammad Rashidi Wahab & Syed Hadzrullathfi Syed Omar. 2014. Persoalan Mutashabihat mengenai Istiwa'. *Jurnal Usuluddin. Penerbit Universiti Malaya, Kuala Lumpur.*, 39: 33–69.

- Muhammad Rashidi Wahab dan Mohd Fauzi Hamat. 2018. Ahl Al-Sunnah Wa al-Jama'ah, Asha'irah dan al-Asha'ari: Satu Penngenalalan. *Jurnal Penyelidikan Islam*, 30: 1–221.
- Muhammad Rashidi Wahab. 2018. Interaksi Al-'Ash'ari Terhadap Ideologi Bertentangan. *Prosiding Seminar Kebangsaan Asyairah Ahli Sunah Waljamaah 2.0*, 146–147.
- Nur Bakri Abd Hamid & Naufal Ahmad Rijalul Alam. 2023. The Development of Islamic Liberal and Its Impact on Muslim in Malaysia. *Al-AFKAR: Journal for Islamic Studies*, 6(3): 627–641. <https://doi.org/10.31943/afkarjournal.v6i3.664>.
- Nuraini Sulaiman. 2019. Kesan Bid'ah Terhadap Perpaduan Ummah. Tesis Sarjana tidak diterbitkan. Universiti Sultan Zainal Abidin, Terengganu.
- Ramli Awang & Roslan Abdul Rahim. 2017. Antropomorfisme Dalam Teologi Islam. *Global Journal Al-Thaqafah*, 7(2): 129–136. <https://doi.org/10.7187/gjat122017-7>
- Shukri Ahmad, Mohamad Khadafi Hj Rofie, Mohd Akram Dahaman, Kamaruddin Ngah & Sobihatun Nur Abdul Salam. 2018. Traditionalist and pro-tajdid method of argument in the Ahlus Sunnah Wal Jama'ah school of thought in Malaysia. *Indian Journal of Public Health Research and Development*, 9(11): 1545–1548. <https://doi.org/10.5958/0976-5506.2018.01668.6>
- Sulaiman Muhammad. 1427. Aḥādīth al-'Aqīdah al-Mutawahham Ishkālūha fī al-Ṣaḥīḥayn: Jam'an wa Dirāsah. Arab Saudi: Maktabah Dār al-Minhāj li al-Nashr wa al-Tawzī'.
- Syed Hadzrullathfi Syed Omar & Nurul Aarifah Musa. 2018. Pembentukan Ummah Wasatiyyah Menerusi Terapi Tauhid Al-Hikam Shaykh Ibn Ataillah. *Jurnal Islam Dan Masyarakat Kontemporari*, 16: 11–22.
- Wan Ahmad Fauzi Hashim @ Wan Husain. 2023. Analisis Hukum Kanun Pahang dari Aspek Ciri Perlembagaan Moden. *BITARA: International Journal of Civilizational Studies and Human Sciences*, 6(4): 220–233.